



Omadus ina vita per il tir: (da san.) Marcel Suter, il president partent ed Otto Morell, il tiradur fidà da Samedan. FOTOS G. N. STGIER

«Surpigliar dapli responsabladad en las uniuns»

Federaziun Grischuna dal sport da tir

DA GION NUTEGN STGIER / ANR

■ **Da chattar ina persona che stat al timun da l'uniun che reunescha ils tiradurs da noss chantun è betg stà pussaivel. En l'avegnir han las uniuns da pajar ina contribuziun annuala pli auta. En il center da las occurrenz da tir stat quest onn la Festa da tir federala.** Tar las uniuns chantunales, saja quai da tir, da musica ubain da chant è bunamain tradiziun ch'il lieu dal president partent segna quel onn per l'organisaziun da la radunanza da delegads. Avant in onn tar la radunanza da delegads da la Federaziun grischuna dal sport da tir a Poschiavo aveva il president *Marcel Suter* annunzià ch'el sa retiria tar la radunanza da delegads 2015 a Domat. Ses pensem principal fin tar quel termin saja da chattar in degn successur e da surdar a quel ina uniun sauna quai che pertutga las finanzas.

Da nov commembar d'onur

Ils davos 12 mais haja el gi contact cun 15 personas interessadas per l'uffizi da president e deplorablmain sajan alla fin naginas stadas prontas da sa metter a disposiziun per quel post. Marcel Suter è vegni elegi il 2003 a Savognin sco president dals tiradurs grischuns e quai sco successur da *Clemens Poltera*. En quels passa diesch onns è el stà in president serius, in um che ha mai pers sia tenuta er

en muments pli critics, ina persona versada cun leschas e prescripziuns, ma en spezial er in bun ami. En quels onns sco parsura dals tiradurs da noss chantun haja el gi blers e bels muments, buns discurs, interessantas s'entupadas e gi l'onur d'organisar duas festas da tir chantunales e cunzunt la festa da giubileum 125 onns Uniun chantunala da tir (BSV) il 2006 a Samedan. In ulteriur punct culminant saja er stada la Festa da tir naziunala avant tschintg onns ad Aarau. Cun in ferm applaus e cun sa dulzar da las sutgas han ils preschents relaschà Marcel Suter sco president e surdà ad el la commemoranza d'onur da l'uniun. Aposta per la tschertga dad in successur per Marcel Suter segna uss ina cumissiun cun commembers da la suprastanza dal BSV sco er dad intgins represchents dals districts da tir.

Adina pli grev da chattar personas voluntarias

Cusseglier guvernativ *Christian Rathgeb* ha supplitgà ils preschents da surpigliar en l'avegnir dapli responsabladad en las uniuns. «Nus avain in chantun cun blers e fitg bunas societads e donn saja bain che adina damain personas sajan prontas da prestar lavur voluntaria», ha ditg *Christian Rathgeb*. Mo cun l'engaschament da blers voluntaris saja pussaivel da mantegnair en noss chantun en il futur quel scazi cultural da nossas uniuns. Blers e cunzunt plets da cor ha Marcel Suter

retschet da *Franz Nager*, il cumandant da la Brigada d'infanteria da muntogna 12. El ha cunzunt er ludà la buna collaboraziun cun il president partent ed en general cun l'uniun che saja er per il militar da gronda valur.

A la fin in cler resultat

Divers onns terminescha la Federaziun grischuna dal sport da tir l'onn da gestiun cun in deficit. Per betg avair er en il futur da far diever da las reservas han ils responsabels fatg la proposta da dulzar la contribuziun annuala per mintga uniun sco er per mintga tiradur cun ina licenza. Fin uss aveva ina uniun da pajar ina contribuziun annuala da 150 francs e per mintga tiradur licenzià ina contribuziun annuala da diesch francs. Cun 94 tar 46 vuschs han ils delegads decidì da dulzar la summa dalla contribuziun annuala sin da nov 300 francs per uniun e 15 francs per mintga tiradur cun ina licenza. La bandiera chantunala ha fatg ses servetsch e duai ussa vgnir remplazzada entras ina nova. Quella vegnia a costar tranter 15 000 e 17 000 francs e per la cumpra da quella spera l'uniun sin intgins donaturis generus. Dals 11 da zercladur fin ils 12 da fanadur 2015 ha lieu en il Vallais la Festa da tir federala ed ils organisaturis quintan cun passa 40 000 participants e sa tgapescha er cun numerus tiradurs grischuns.



Cusseglier guvernativ *Christian Rathgeb* cun *Kevin Brunold*, commember da la cumissiun da gestiun da l'uniun che reunescha ils tiradurs da noss chantun.



Il nov ed il president partent dals veterans da tir dal Grischun: (da san.) *Othmar Casutt* e *Jakob Bardill*.



Vegn a manar transitoric l'uniun per in onn: *Walter Burkhardt*. Qua cun *Erika Loretz* che segna per il ressort finanzas tar l'uniun.



Hubert Tomaschett, ressort sport da prestaziun ed *Anna Marugg*, ressort pistola.



Tar ina occurrenza a Domat dastgan segir betg mancar ils tamburs.



Il president da la vischnanca burgaisa da Domat, *Theo Haas*, flancà da brigadier *Franz Nager* (san.) e colonel *Lorenzo Rampa*.